

KAD STRANKA NE ŽELI DATI RADNO MJESTO NEKOM OD KOG NEMA POLITIČKE KORISTI - KRAJ KARIJERE AMBICIOZNE MLADE OSOBE

Snovi i aspiracije: počeci obećavajuće karijere

Obrazovana i ambiciozna djevojka (31) stiče magistarsku diplomu svoje struke veseleći se radu u javnoj ustanovi, što je oduvijek i bio njen san. Za taj san, njena porodica je godinama zajedno sa njom ulagala u njeno obrazovanje želeći da svoju karijeru gradi u Bosni i Hercegovini. Međutim, u tom usponu, predstavnici jedne političke stranke, koja je vladajuća sa partnerima u njenoj lokalnoj zajednici, staju joj na put.

Dobivši ugovor na određeno vrijeme, počeo je njen rad u jednoj javnoj ustanovi. Naša sagovornica naglašava da je bila jedina unutar općine koja zadovoljava kriterije za to radno mjesto jer je i samo njeno zanimanje deficitarno.

Uznemirujući susreti: od opuštenosti do superiornosti stranačkih osoba

Kaže da se prvih par mjeseci rada zaista se činilo mnogo bolje od očekivanog.

„Onda, sve je počelo naizgled bezazleno. Tu i tamo pokoji komentar kolegarica o zastupljenosti političkih stranaka u javnim ustanovama i njihovom golemom uticaju na iste, ali se nisam pronalazila u tim temama, jer se nisam previše interesovala za njih. Željela sam dobro raditi moj posao i samo me to zanimalo.”

Nedugo zatim, ističe, kreće otvoreno targetiranje. "Par starijih kolega, u tom trenutku članova vodeće političke partije u našem malom gradu, ulaze u razgovor sa mnom ispitujući da li sam učlanjena, gdje sam učlanjena, ali i dalje kroz opušten i naizgled prijateljski stav. Vremenom se ta opuštenost gubi i zauzima se superiorniji stav, pa dobivam "sugestije" da moram biti pametnija, jer ih ima još koji čekaju u redu za posao. Diskriminacija je rasla iz dana u dan. Bližili su se lokalni izbori, a tako i pritisak. Počela sam dobivati poruke na svoje privatne profile na društvenim mrežama, obraćali su mi se ljudi koje i nisam lično poznavala, pozivajući me na skupove i "druženja" nakon skupova da popričamo o "mom novom poslu". Nakon brda istih, na jedan sam se poziv odazvala. Bez cenzure, među zidovima kancelarije i u krugu par stranačkih osoba (od kojih je i par mojih kolega), rečeno mi je šta se od mene očekuje: potpuna podrška, što više glasova, kao i novih članova. Ja sam svoj posao dobila isključivo na osnovu svoje visoke naobrazbe i profesionalnih preporuka, a našla sam se u situaciji gdje bi se morala boriti da ga sačuvam tako što ću lobirati na ljude iz svoga života."

Pokušaj očuvanja karijere i mira

Sagovornica navodi kako je pokušala biti poslušna i ići linijom manjeg otpora. Dopustila je i da joj ime bude na listi za funkciju unutar općine, misleći da im tako donosi neku korist i da će je pustiti na miru.

"Ne znam i dalje zašto sam stavljena tu, da bi im nešto dugovala ili da bih neki imaginarni dug izmirila. Željeli su predstaviti 'svoj'

mlad i obrazovan kadar, a ja sam im se u tu sliku uklapala. Na moje prvo protivljenje, dobila sam tvrdnje kako to nije ništa važno i da se tu imena redaju 'reda radi'. Nisam zadovoljila njihove zahtjeve i očekivanja, jer se nisam ni trudila da budem dijelom toga. Vjerujem da su očekivali da mojim učešćem, moj primjer slijedi i moja porodica, prijatelji, poznanici i da ću se ja za to potruditi. Ni funkcije, ni titule, baš ništa osim mira nisam željela. Ipak, moram napomenuti da bih izbjegla generalizaciju, tu je zaista bilo i par korektnih i dobrih ljudi ali njihov glas, baš kao i moj, nije imao nikakvog značaja u tom okruženju."

Kraj karijere: Stranka ne želi gubiti radna mjesta na ljude od kojih nema koristi

Sagovornica ističe da je lahko odgovoriti na pitanje zašto su to radili - nisu željeli "gubiti radna mjesta" na ljude od kojih nemaju koristi, konkretno političke.

"Osjećala sam se duboko razočarano i u jednu ruku prestrašeno, jer sam znala da nemam aduta s kojim se mogu boriti protiv njih. Stojim sama u svojim 20-im nasuprot godinama ukorijenjenog sistema u bosanskohercegovačkom društvu. U trenutku, u vodu je pao sav moj trud i prije i tokom rada u toj ustanovi. Koristi im, očito, nisam dovoljno donijela, jer su vremenom odustali od pritiska i uručili mi otkaz. Otkaz, bez ikakvog valjanog razloga i objašnjenja."

Razbijeni snovi: Prinudno povlačenje iz profesionalnog života

Sagovornica navodi da je razmišljala o žalbama, međutim i da je ipak dobro znala ko je i na tim pozicijama i da će njena žalba na njihovom stolu vrijediti koliko i prazan papir. Navodi kako se ona nalazi u manjoj lokalnoj zajednici i da oni koji moć imaju ne dijele je za džabe.

„Ja od tada nisam radila više niti jedan posao u svojoj struci, a posebno ne u svom gradu. Diploma mi stoji na polici, a ja radim sezonske poslove po okolnim zemljama, zarađujući za život. Na mom bivšem radnom mjestu sad je manje obrazovana osoba koja ne dolazi iz tog grada, zahvaljujući tome što je poslušnija.“